



**Komunikadu Imprensa**  
**30 Novembru 2020**

## **JSMP husu ba Komisaun A PN atu hadi'a nia mekanizmu audénsia públika iha futuru**

Komisaun A Parlamentu Nasional (PN), iha Kinta-Feira 26 Novembru 2020 realiza audénsia públika iha Munisípiu Ermera kona-ba esbosu Lei Podér Lokál no Desentralizasaun Administrativa no Lei Eleitorál Munisípál. Audénsia ne'e hetan partisipasaun husi adjuntu autoridade Munisípál Ermera ho diretór munisípál sira, xefi suku, representante relijiozu sira, representantre partidu polítiku sira, veteranu sira, ONG no grupu fetu sira.

Prezidente Komisaun A, distintu deputadu Joaquim dos Santos iha audénsia ne'e dehan katak objetivu husi audénsia ne'e mak atu rona preokupasaun sira autoridade lokál sira nian no entidade relevante sira kona-ba esbosu lei rua ne'e. Nia mós apresenta sumáriu pergunta sira kona-ba importánsia husi lei rua ne'e ba autoridade lokál sira, vantazen no dezvantezen, direitu no dever sira, kompozisaun assembleia no kompeténsia sira. Relasiona ho Lei Eleitorál Munisípál nian, Prezidente Komisaun A husu atu fó komentáriu kona-ba sistema eleisaun, rekezitu sira atu kompete iha assembleia munisípál no presidente autoridade no organizasaun eleisaun. Partisipante sira foin simu kopia husi esbosu lei rua ne'e iha oras audénsia nian.

“ JSMP husu ba Komisaun A Parlamentu Nasionál atu hadi'a mekanizmu audénsia públika liuhusi prepara sumáriu eskrita ba kestaun sira ne'ebé presiza halo diskusaun iha lian Tetun no distribui tiha antes nune'e bele fasilita ho di'ak partisipante sira-nia partisipasaun iha diskusaun no audénsia ne'e bele sai efetivu ka iha rezultadu ne'ebé di'ak liu hodi kontribui ba prodús lei ne'ebé refleta realidade, interese no aspirasaun ema barak nian,”dehan Diretora Ezekutiva JSMP, Sra. Ana Paula Marçal.

Partisipante sira iha audénsia ne'e lamenta tanba Komisaun A foin mak fahe esbosu lei rua ne'e iha tempu audénsia, nune'e difikulta tebes sira atu fó komentáriu no susar liu tan mak lei rua ne'e hakerek ho lian Portugés. Nune'e, partisipante sira rekomenda de'it no la fó komentáriu barak no sira kompromete sei submete sira-nia rekomendasaun sira por eskrita.

Preokupasaun sira ne'ebé partisipante sira hato'o durante audénsia ne'e mak kona-ba fahe reseita sira entre Governu Sentrál ho Governu Lokál, kritériu sira kandidatura ba Assembleia Munisípál la bele hamosu diskriminasaun liuliu ba representante veteranu no independente, kritériu kandidatura ba Prezidente Autoridade tenke mai ho ema ne'ebé moos no iha kredibilidade. Partisipante sira balun husu veteranu sira-nia representasaun tenke iha de'it konsellu konsultativu no valór sira ligadu ho direitu no devér deputadu sira Assembleia Munisípál kompara ho deputadu Parlamentu Nasionál tenke tetu fila-fali.

Relasiona ho kestaun hirak ne'e, deputadu sira la halo resposta, maibé fo sira-nia komentáriu jerál de'it katak preokupsaun sira ne'e sira nota atu konsidera iha diskusaun lei rua ne'e no sira konsidera lei rua ne'e importante ba Timor-Leste tanba ne'e husi representante deputadu sira husi bankada sira ne'ebé sai membru Komisaun A, hanesan Partidu CNRT, Fretilin. PLP no KHUNTO kompromitidu hodi fó apoiu tomak ba finaliza diskusaun lei rua ne'e iha sira-nia mandatu.

Observasaun JSMP audénsia públika ne'e nota katak lei rua ne'e Komisaun A foin mak fahe bainhira hahú abertura ba diskusaun no lei rua ne'e kontinua iha versaun Portugés. Xefi suku sira hotu husi postu Administrativa Atsabe la partisipa iha audénsia públiku ne'e tanba hetan vizita husi Prezidente Parlamentu Nasionál.

Atu hetan informasaun liutan favór kontaktu:

Ana Paula Marçal  
Diretóra Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Website: <http://jsmp.tl>

Rua Beco Lakateu, Aldeia Manufiuk,  
SukuColmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77040735  
[www.jsmp.tl](http://www.jsmp.tl)  
[luis@jsmp.minihub.org](mailto:luis@jsmp.minihub.org)  
Facebook: [www.facebook.com/timorleste.jsmp](http://www.facebook.com/timorleste.jsmp)  
Twitter: @JSMPtl